




蘇州府志

卷三



蘇州府志卷之二

巡幸中

乾隆十六年歲在辛未

高宗純皇帝舉南巡之典恭奉

聖母皇太后鑾輿


巡幸江浙省方觀民入疆考績二月二十一日抵蘇州

駐蹕織造府行宮先是十五年正月初二日奉

上諭各省耗羨銀兩非正供司比朕巡幸所至地方應酌量加

恩以舒民力所有江蘇省未完銀兩蠲免十分之六該督撫確

查實數務使閭閻均沾實惠以普恩膏又兩江總督黃廷桂奏



江寧鎮江蘇州等處應行豫備官兵祇候

大閱惟蘇州撫標額兵僅止五百餘名不足備閱查鄧尉山下前傍太湖此地水勢不深溜亦平恬帆檣易施合操水陣似覺便捷可觀臣謹量調蘇松鎮標及太湖營船隻於鄧尉山豫備恭候

皇上駕臨鄧尉登山閱視十二月十三日奉

旨允行本年正月初二日又奉

上諭東南貢賦甲於他省其歷年積欠錢糧每年新舊並徵小民終未免拮据茲當翠華親莅倍深軫切用普均霑之澤以慰望幸之忱著將乾隆元年至乾隆十三年江蘇積欠地丁二百

二十八萬餘兩悉行蠲免二月初一日又奉

上諭三吳兩浙爲人文所萃本年歲試文章府學及州縣大學著增取五名中學增取四名小學增取三名舉行一次十九日奉

旨著派錢陳羣胡寶瑤七達色烏米泰多爾濟致祭周泰伯祠先賢言子祠宋臣范仲淹祠韓世忠祠本朝巡撫湯斌祠張伯行祠總河陳鵬年祠又奉

旨進詩之少詹事習寯編修葉長揚庶吉士韓孝

道光志  
誤作少基著

各賞緞二匹貂皮二張二十二日

駕至虎邱之千人坐從天橋歷大雄殿卓午微雨

上命回

鑾

賜御書墨刻寶塔心經金剛般若波羅蜜經

御書扁額對聯藏香白金五十兩二十三日奉

上諭願祖鎮著加恩賞給五品職銜二十五日奉

上諭朕命駕南巡周覽風俗觀民察吏惟日兢兢三吳素所屬念也粵自我

皇祖聖祖仁皇帝巡幸東南先後六舉歷今四十餘年盛典昭垂衢謠在耳頃者入境以來白叟黃童扶攜恐後就瞻愛戴誠意可嘉朕已疊沛恩膏廣敷渥澤惟念大江南北土沃人稠以

百年休養戶口益增習尚所趨蓋藏未裕紛華靡麗之意多而樸茂之風轉有未逮夫去奢崇實固閭閻生計之常經而因時訓俗以宣風而布化則官茲土者之責也其尚勵乃實心以行實政無忝教養斯民之任凡茲士庶更宜各敦本業力屏浮華以節儉留其有餘以勤勞補其不足時時思物力之維艱事事惟奢靡之是戒將見康阜之盛益臻父老子弟共享昇平之福朕清蹕所至有厚望焉奉

旨李重華著加恩賞給編修原銜三月初一日奉

上諭經史學之根柢也會城書院聚鬻庠之秀而砥礪之尤宜示之正學朕時巡所至若江寧之鍾山書院蘇州之紫陽書院

杭州之敷文書院各賜武英殿所刊之十三經二十二史一部  
資髦士稽古之學十一日又奉

上諭朕問俗省方翠華所至黃耆台背策杖歡迎優恤高年推  
恩宜渥著該督撫查明經過州縣男婦七十以上者照從前恩  
詔之例分別賞資十八日奉

旨范仲淹後裔范宏興范聖宇范成章范爾宸范嶧等五人著  
各賞給緞一匹貂皮二張二十三日奉

旨致仕侍郎沈德潛著加恩照依原官賞給本俸  
召試進獻詩賦諸生

欽取一等五名特賜舉人授為內閣中書內第四名褚寅亮係

長洲人吳縣人張宗蒼獻吳山十六景畫冊

御筆每幅題詩一首命充畫院供奉監生徐揚獻畫冊命充畫

院供奉四月初四日奉

旨嚴宏滋徐揚張宗蒼著各賞緞一匹此載今據旨道光志不

典補道光志又云十八年徐揚初七日奉

旨著於商捐供億銀內賞給蘇州織造圖拉銀一萬五千兩此

旨道光志不載今據南巡盛典補按此大

臨幸地方及各論旨道光志皆不著月日先後

遣散秩大臣副都統誠毅伯烏米泰致祭周泰伯文

惟周泰伯孝先體志友更從心值商祚之將移早裕化家之識

望南邦而戾止俾無立幼之嫌熏遜讓於三吳遙開千萬年之  
 文物泯稱述於黎庶隱啟八百祀之太平差至德於宣尼奠乎  
 尚矣存古祠於唐相風示來茲朕時邁省方致深懷古覩江鄉  
 之殷庶宜飲水而思源申典禮於牲牲冀備物以展敬靈其鑒  
 格尚克歆承

遣刑部侍郎錢陳羣致祭先賢言子文

惟先賢言子靈萃中吳道承東魯贊成麟筆首聖門文學之科  
 小試牛刀布下邑絃歌之化周旋褐襲羣推習禮之宗品藻端  
 方允副得人之問殿庭俎豆班十哲以同科祠廟粉榆閱千秋  
 而在望朕省方時邁覽古興懷問俗武城信學道之遺風足尚

敷文南國溯人才之教澤所漸用遣專官虔申告奠苾芬在列

尚冀格歆

遣理藩院侍郎多爾濟致祭宋臣范仲淹文

惟宋臣范仲淹康濟居心明誠為學先憂後樂未仕常懷已仕  
 之心度務揆機為相兼裕為將之略子朱子人物之論謂能曲  
 盡人情錢公輔義田之文稱其克敦族誼雖言旋於故國仍歸  
 老於山塘鄉人祀其芳儀子孫食其厚報朕南邦駐蹕錦里維  
 舟吳郡不乏賢才曰姑舍是慶曆稱多君子其在斯人展眷注  
 於牲醪庶爾靈之來格

遣內閣學士兼禮部侍郎胡寶瑤致祭宋臣韓世忠文

惟宋臣韓世忠勇可冠軍智能料敵寄身麾下始超拔於偏裨樹績行閒遂毗倚以重大定復辟之策指天日以爲期論中興之功雖趙喻無以尙救忠貞之誣服昌言三字之冤知時勢之難爲晚託西湖之跡朕時邁南邦眷懷名將功名炳於宋室史冊增輝褒賞被於清時苾芬是飭靈而不爽尙其鑒茲遣御前侍衛七達色諭祭原任禮部尙書湯斌文

惟爾學可匡時政能化俗早簪毫於丹地茂著聲華旋秉節於外臺克稱清惠交章薦剡徵擢頻膺適當史館之需才遂與詞科之上選講究必宗濂洛著述皆醇期許自命范韓經猷素裕感三吳之人士猶誦甘棠考六察於賢良曾光雕俎朕眷舊情殷思賢念切望南郊而駐蹕禮祀特隆稽彝典以昭榮苾芬是飭靈其不昧尙克來歆

遣御前侍衛七達色諭祭原任禮部尙書張伯行文  
惟爾端方制行廉靜居心通籍而職佐河壩功資捍禦歷任而節移閩海績著無綏政務愛民立教以農桑爲本公餘課士講學以經術爲先江左流膏清惠久孚於輿論容臺望重威儀早洽於朝端朕時巡二月駐蹕三吳稽茂典而沛明禋苾芬是飭溯先朝而懷舊碩風範如存爾靈有知庶其來格

遣御前侍衛七達色諭祭原任河道總督陳鵬年文

惟爾陳鵬年性秉剛方學優經濟山城出宰奏循卓於浙西劇

郡宣猷流清惠於江左邁飛章之組織幾陷網羅幸

清問之公平頓開雲霧編摩秘殿得叨珥筆之司總制河渠茂

著安瀾之績三吳人士愛慕從心兩祀馨香賢良屈指朕巡幸

所至恩眷有加飭牲醴於有司用表彰夫芳躅爾靈不昧庶克

歆茲以上各祠祭文道光志不載  
今從南巡盛典補

賜沈德潛

水碧山明吳下春三年契闊喜相親玉皇案吏今煙客天子門

生更故人別後詩裁經細檢當前民瘼聽頻陳老來底越精神

健劫外胎禽雪裏筠此詩道光志不載今從  
南巡盛典補

駐蹕姑蘇

牙樞春日駐姑蘇為問民風豈自娛豔舞新歌翻覺闌老扶幼  
挈喜相趨周諮歲計云秋有旋察官方道弊無入耳信疑還各  
半可誠萬眾慶恬愉

奉

皇太后遊虎邱卽景

閒登海湧峰雨洗綠鬟濃古蹟多留詠春郊盡力農雲樓既虛

敞月牖且從容最引予心慕

虞歌每每逢

誰云金寶氣化作虎邱山西踞瞻湖墅東臨鎮市寰巖姿浮刻

削澗響瀉潺湲聽法猶存石生公舊往還



梅綻三分白麥抽千畝青飲泉思陸羽卓錫擬支硎雲罨石常  
潤風和草亦馨智仁山水德

樂壽頌慈寧

虎邱寺和蘇軾韻

曾聞沈恭子論詩虎邱嶺商周二千年逸事談井井平原為磨  
崖光怪龍蛇耿雙絕尋無踪累句紛畫龜汲古得蘇詩兼金固  
在礦硬語出橫盤有似魚腸猛當年圖伯人志氣頗馳騁倏爾  
埋瀕池囑子徒淒哽不及槃郢氣化石彈指頃行春喜初地不  
礙東風冷天水日與暢琴書興以永歸騎循蘭蹊江城入雨景  
何當巖半閣坐弄新蟾影去留隨所適奚用山僧請

遊支硎

馬首見支硎迎人罨秀色一徑入松竹峰秀不可得到山始暢  
然環秀真奇特卻失來時徑但見綠雲羃山川聚靈氣變幻曷  
有極迴向參世尊萬慮於以息石室汲寒泉一一供遊歷支公  
鶴不聞空亭祇留迹

寒山千尺雪

支硎一帶連寒山山下出泉為寒泉淙淙幽幽赴溪壑跳珠濺  
玉多來源土人區分稱各別豈能一一徵名詮蘭椒策馬尋幽  
勝山水與我果有緣就中宦光好事者引泉千尺注之淵泉飛  
千尺雪千尺小篆三字銘雲巒名山子孫真不絕

用吳梅村詩意安在

捨宅資福田槃陀坐對清萬慮得未曾有詩亦然雪香在梅色  
在水其聲乃在虛無閒

聽雪閣

千尺雪之上架白屋三間水窗俯暢碎澗之聲滿耳跳激之勢  
謀日閣素無名名之曰聽雪而係之以詩

雪宜落天上云胡落澗底其源不可極千尺約畧耳三閒白板  
閣占盡林泉美珠玉碎復完琴筑鳴無止澗葉冬不凋巖葩春  
似喜入望窈且深宜聽靜方始是合忘名言而復不能已

華山

問山何以分高下宜在引人詩興者遙瞻濯濯青芙蓉南嶂猶

平堪跋馬登峰造極覽全吳卻步鳥道尋蘭若左右泉聲上下  
雲閒以疏梅秀而野歷險即夷小憩留別室數字致瀟灑琅玕  
千个綠雲叢笙筑百道銀雪瀉我遊名山亦已多謂當無過田  
盤也此閒松石遜怪奇梅竹彼應讓都雅兩山何用費較量夢  
寐他時總心寫

恭依

皇祖華山詩韻

觀水有其術入出不厭深境無容俗混林豈受樵侵香遞英英  
朵聲喧命命禽

宸章垂琬琰胞與識

胸襟

駐蹕靈巖

塔影遙瞻碧漢中  
梵王宮側舊離宮  
觀民展義因時切  
石棧雲林有路通  
竹籟蕭蕭喧處靜  
梅花漠漠白邊紅  
太湖萬頃軒窗下  
坐辨洞庭西與東

靈巖雜詠用沈德潛韻

館娃宮

瓊宮號館娃  
豔歌復麗舞  
歡娛廿三年  
淒涼一塚土  
偶來尋舊蹟  
山徑步芳杜  
哲婦能傾城  
炯戒垂今古

琴臺

白銀世界中  
石湖言則然  
而我攬奇景  
其趣符昔年  
月出山寥寂  
風定波潺湲  
琴聲靜無聞  
雲扃寄高眠

響屨廊

夾徑多長松  
度松漸豁敞  
伊昔構曲廊  
夷光留屨響  
屨響久不聞  
春煙蒙蔓莽  
小草設有知  
云見人來往

涵空洞

靈巖三百丈  
巖巖凌虛空  
高閣俯太湖  
鏡影澄微風  
吐納閱今古  
變化資魚龍  
清夜淨萬緣  
鐘聲下梵宮

吳王井

山下宜出泉  
云何於其頂  
行雲時吐英  
古魄幾留影  
子胥抱孤

忠不食空垂綆徒傳豔冶蹟貽羞日月井

研池

石鼓涼天池清波澹泠泠扶欄成小憩春薛匝發青我欲習揮毫古帖徒縱橫筆諫有名言豈事龍蛇驚

采香徑

采香勝采葛采葛行野露欣戚不同倫誰知繪後素倭墮龍春芳甲煎蒸曉霧坐看笠澤邊越師來薄暮

翫花池

山花落春風貼貼依溪谷底怪吳宮人鎮日翫不足紅顏已塵土蒼巖仍湛淥三復德潛詩吾心一以浴

遊鄧尉山觀梅坐花下興至寫王冕筆意即題二絕句

香雪舊曾聞真逢意所欣南華篇第二小大漫區分

真者在目前肖貌轉難為愛他姿特別記取會心枝

鄧尉香雪海歌并命沈德潛和韻

鄧尉之名久詔吾鄧尉之奇今見初一四天下總在海都梁嶸

山夫豈誣天風卉歛波濤泛春日淡冶漣漪舒目謀耳食已絕

勝更惟鼻觀難為模傑池韶秀復菊菊泌凜案衍還縈紆坐令

甲煎嫌豔膩遠慮葱嶺非坦途山僧抱月眠初醒卻蹠道左紛

相趨爾所羨者我厭久我所慕者爾厭餘乃知兩全信難得何

妨一晌供清娛北眺虎阜南太湖南船北馬用各殊此閒無可

無不可滿坑滿谷酬所需林逋畢竟寒儉相但詠香暗及影疏  
德潛黃山詫雲海咄咄香雪詎可孤東皇亦解助韻事春寒勒

待今臨吳春寒勒待今臨吳平山何有見金夫平山鹽商雖種梅而今歲春寒

到時始綻數英今正值盛放之時故戲及之

宴準噶爾夷使

渠搜入貢值巡方後隊隨行許觀光麾去招來遵我約羶裘帕  
額適其常三巡湛露申歡豫二月東風正豔陽深戒誇奢纏錦  
樹盈室畧足示來王

春分

日日行程不計日偶然問及道春分梅教待客常禁冷山為標

靈多出雲明媚未勝遮莫惜景光隨遇每生欣館娃遺跡何須

問梵塔鈴聲靜夜聞

夜雨

北方此際惟虞少南國今來卻慮多祇論游觀無不可重因農

務望晴和以上三首道光志不載今從南巡盛典補

法螺寺

前朝跋山路法螺近咫尺卻為遊華山竺菴暫虛擲靈巖今返  
蹕取便尋幽適牝谷纔幾曲便覺仙凡隔石泉常似咽磴道不  
嫌窄別室亦瀟灑松竹有佳色微辨來時路下盤綠雲隙

千尺雪即景雜詠

別水淙潭歎雪光清遊兩度樂徜徉范家引業偏幽勝導我間  
吟半刻強

屢屢門徑步雲巖小閣三閒迥不凡便與佳名顏聽雪何當坐  
此讀華嚴

湍激波迴萬狀聲今來練影益晶明應緣畢獻山靈技無不相  
宜雨與晴

拱把竹籠曲折徑抱環山疊屈紆屏吳人雅解增佳話新樣初  
看个字亭

一室蕭然翰墨香綠雲叢裏奏笙簧煙霞供養無窮樂何必彈  
冠慕姓王

別業中舊名其室曰彈冠蓋取  
王陽在位貢禹彈冠之意云

再游支硎

兩日靈巖巖果靈更尋光福叩雲扃如斯佳境安能盡不及歡  
情慢久停旋命歸舟指吳會取便策馬憩支硎一天快霽予心  
暢下視方方麥坂青

吳山十六景

吳人張  
宗蒼畫

萬笏朝天

入山思水秀涉水憶山青吳門兩兼更雙絕致我清蹕為延停  
朝來天平翠色在窗牖復得經營慘淡傳神手二八冠景舊標  
名兩三具法新結構望中峰姿巒態無不有豈必一一窮林藪  
巉巖萬笏朝天閭彷彿萬方玉帛咸來王

寒山曉鐘

姑蘇城北夜泊船寒山鐘聲清曉傳春容斷續亦同此傳不以鐘以人耳千秋過客不一況或聽歡欣或悽愴在懸待叩總無心此意畫師何以狀

支硎翠岫

支公石室山為屏上九肥遜君子亭枕流漱石可娛志墨名儒行何拘形我來竭爾尋勝賞春山蔚鬱堆新青吹竹細籟戛笙筵出竅流雲合杳冥緬懷愛馬重神駿軒軒霞舉新發硎

千尺飛泉

千尺泉飛有聲雪下激迴噴石根裂石根裂處得溪平淵澈澄

泓清且潔匡廬何大此何小

俗名小匡廬

空諸所有無諸擾南華第

二已分明坐而證之益了了

法螺曲徑

支公開山名報恩二楞伽嚴堂尚存偶尋曲徑至初地隨步回轉相循環往往詭石嵌絕壁風吹欲落驚無根歷危即安契靜悟了不可得難名言吹大法螺建法幢覺大千世惟世尊名山得名此探源豈謂曲肖螺紋旋

華山鳥道

山之秀者稱芙蓉不宜在陸宜在水高矗青霄俯太湖恰當是山名所以天花天樂動逢迎石徑松泉尋迤邐人人塵念到此

捐大士端居無憂喜如在八功德池中合十都坐青蓮蕊  
天池石壁

華山中空孕靈泉天池湛綠光含天云產千葉之石蓮服之白  
日成飛仙成仙有道亦賴緣太康以後迄無傳鐵鎖欲絕吁可  
憐不如枕流漱石樂性全

石湖霽景

吳中多雨難逢霽霽則江山益佳麗佳麗江山到處同惟有石  
湖乃稱最楞伽山半泮煙輕行春橋下春波媚南宋詩人數范  
家孝宗御筆留巖翠

靈巖積翠

我登靈巖駐兩日雨晴雲月景非一目不暇給吟難工山靈獻  
技景畢出畫師圖得積翠狀澗葉峰枝扶率律太湖煙景蕩遙  
空遮斷長林似相失

海湧一峯

一峯不知何所來萬古崑秀臨蘇臺詎數層巒及疊嶂饒看野  
竹兼疏梅石泉鶴瀾瀉冰雪梵宮琳宇棲崔巍晴空照影入滄  
海宛似湧出西蓬萊是宜仙人所託憩而我登臨實快哉

鄧尉香雪

幾點青螺雪海裏未逢此境謂虛擬梅花宜瘦亦宜肥今日於  
梅歎觀止香氣濛濛香色融融吟香忘雪辭難爲工頃在寒山



千尺雪謂香在梅色在水其聲疑在虛無中乃今悟其言非是  
色香聲備天爲功老幹一枝臨窗寫只恐毫端乏爐冶遊鄧尉  
日卽花  
下寫梅枝小幅并  
題兩絕句紀之

光福山橋

鄧尉光福相連延白銀界裏青峯攢虎山溪亦得名虎石橋彷彿三嘯傳水光山色淡容與雲帆月舫常留連欲寄清吟攄逸興飛據高峯塔影邊

穹窿仙觀

陽山高抵穹窿半拔地千仞參霄漢琳宮梵宇倚層椒時有雲氣爲光幻云昔赤松餐石脂絕粒昇仙侍香案我乃殷憂茅簷

蒨屋民惟恐一夫向隅不得加餐飯

包山奇石

震澤三萬六千頃神區奧壤無不包是山得名獨標眾下臨無地上干霄怪異不堪俚指數奇石多出山之凹波衝浪激成孔穴柔能克剛理則昭米顛一拳誇亭帶作記豔說皇山樵誠令觀此難爲石八十一穴真鷓鴣洞天福地列第九丈人竊書傳童謠傳稱夫子不語怪此語何自真虛囂

莫釐縹緲

洞庭相望分東西西則縹緲東莫釐兩峯竊窟連雲水是一是二誰然疑漁舟賈舶浮浦澈月天琳宇棲欵寄眼前勞逸不可

齊誰欲齊者問畫師

蘇臺春景

胥臺高見三百里只今培塿惟存耳  
吳人言吳不忍廢就山爲  
亭亭亦圯春來景物紛融和  
頻聞漁唱及樵歌  
越來溪畔溶溶  
月閱盡荆凡影不磨

舟發姑蘇

蘭鷁發胥江風平五兩雙  
霽天留曉月麥剡入蓬窗  
行閱溪山畫真稱文物  
邦具區空闊裏湧出洞庭雙

寶帶橋

匪伊垂之玉有條  
兩湖春水綠如澆  
印公豪放蘇公物  
飛作吳

中第一橋

田家春興

湖山豈不美最喜是田家  
過雨修春末臨溪轉水車  
東阡芄綠毯西陌簇黃  
花攬結真娛意端勝玩物華

城市厭笙歌農謳愜聽多  
三時務耕織六畜富鷄鶩  
高廩村場積新芻父老  
醜今年春雨足卜稔望晴和

題陳涪虎邱圖

一峯海湧多奇石往往清  
泉出石隙龍宮鴈塔據  
霞標下瞰溪田萬頃碧  
我昨登臨暢遠襟拈吟  
曾倚蒼巖柏道復此卷  
真傳神墨瀋猶分翠微  
色顰尾聯吟傳石川無  
限深情寄今昔詎料

摩抄尺幅時早非唱和當年客

姑蘇覽古雜興

泰伯開基後原為禮讓鄉誰知闔廬代乃作互爭場熊膽心殊  
毒鳴夷志不忘一塚竟安在煙水浩茫茫

孫堅真有子江左獨稱雄鼎立曹劉際瓜分山海中魯周司內  
外襟帶控西東風與吳人便無妨臺起銅

司徒構別墅捨作化人園想像林泉概依稀松菊存石經開士  
悟屐帶謝公痕槃郢秦王索荒唐說虎蹲

是地稱良守風流白樂天鑿渠敦實政攬景富嘉篇已覺山塘  
好兼教霓舞傳木蘭堂賦古翹望屬前賢

五賢祠畔過應物

韋

果清真劉

禹錫

白

居易

稱同調蘇

軾

王

禹偁

繼後

塵江山真助秀煙月鎮從新即境求佳句張家更絕倫

綺角猶存里葦鱸亦有亭故山思遯世上國重敷庭平水常浮

白奇峯不斷青誰為高士傳於此取儀型

近代工詩畫倪唐亦可稱林猶師子昔坊是解元曾最愛靈巖

秀真宜煙客登

沈德潛卜居靈巖山下故詩及之

江河流不廢我許是人能

題揚補之梅花三疊圖即用其韻

一疊憶我三友軒盆梅清供冬前早修枝借得吳質能翦綵窗

遜隋宮巧古香臕臕生面證新月溶溶夜珠照情知指日到江

南遞來春信先覺好无咎此枝寫其神拂拂香風撲清曉太璞

上人何許人相投自是詩禪老隱名今乃盛傳名畢鉢巖前刹  
竿倒卷中題詠皆云為太璞上人而上人自無題識故云

二疊憶我平山堂淮人解事虞開早鄧尉春暖愁已零種樹供  
賞清而巧豈知青帝有權衡江北江南不遺照春寒纔放數枝  
花花稀卽有稀中好是時蜀岡微雪霽嫩日輕風山路曉疏疏  
點點時或逢如在商顏尋四老頗多惜未盛開人但取繁華堪  
笑倒

三疊憶我鄧尉山梅花不遲還不早友松微嫌太古朴笑杏直  
厭憐乖巧三冬何足易此心一枝業已寫其照適在鄧尉作梅  
一枝命黏壁間  
不必侈談香雪海倚石依巖無不好聞之三弄吹蘆管惜哉聲

律吾不曉此圖恰合譜絲竹至今猶見逃禪老漸入佳境疊疊

奇三友平山真壓倒

以上三疊道光志不載今  
南巡盛典補

紫陽書院題句

沈德潛主紫陽書院為乞額因顏之曰白鹿遺規并成是什

械樸重育賢菁莪厘卽俊矧茲文雅都造士方應慎書院號紫  
陽義益由慕蘭德潛縱懸車鄉教猶能振乞我四字額更無他  
語訓白鹿有芳規氣貴消鄙吝學非養貧地貧乃士之分學復  
不重華華乃實之覺功或虧一簣山弗成九仞詩雖夙所耽不  
足示後進努力崇實修佐我休明運

題文徵明春雨晚煙圖卽用其韻

煙重長林水漲汀善傳吳景是徵明姑蘇不到安知此解使江  
山氣韻生

鶯脰湖詞

極目煙波天四圍鶯湖正值早鶯飛漁人買客皆歡喜帆飽還  
兼春水肥

網絲風信是催漕吳人名東南風為催漕風雨後蓑衣曬處高棹指垂楊輕

傍岸綠雲枝上掛銀刀

春草碧色水綠波遙看吳岫濯青螺此間誰是相宜者聞道前  
人有致和

平望

景霽風微湖似鏡輕帆廿里暢人心樓臺遠近稱吳望老幼扶  
攜漸越音澤滿魚鰕船作市地多桑柘樹成陰吾民庶矣思藏  
富惟有祈年志倍欽

迴鑾至蘇州駐蹕

稽山修祀罷浙水省方迴道便舟重駐春深花盡開輿情多眷  
戀我意亦徘徊懷保相關處茲遊益信哉

聽雪閣再題

據勝嘉其信美聽雪重此嬉春大珠小珠落澗徵招角招鳴鈞  
境寂早寒衣袂景濤迴謐心神新見桃花貼水卻喜人非避秦

華山翠巖寺

鳥道黃緣上微風蘭蕙馨天花試禪意澗水演真經  
鶴下講臺白蓮擎佛鉢青千竿綠雲裏又得小延停

靈巖行宮卽景雜詠

千峯崑翠百花穠山館重臨春正酣更值晴明窮遠目具區無際雪濤涵

花姿樹態總無塵信是靈巖別有神洗滌繁華歸淨所合教箇

下住詩人

用吳語謂沈德潛住此山下也

巖扉蔚秀綠雲稠石甃花池貯澹流佳處意當留不盡好教打

疊理歸舟

題唐寅西山草堂圖

處士瀕湖此結廬蕭然書史樂三餘姓名不愧稱潛德

卷為晉陵人丁

潛德圖畫端因倩六如依舊有山今馬蹟那尋白屋昔雲居千

秋一瞬留佳話印證當前益起予

海棠

靈巖初見海棠開倩倚東風笑落梅吳會女夷慣誇富不教一

并漏春臺

和沈德潛山居雜詩十首韻

德潛蘇人也家居葑門而構別業於靈巖之陽適駐蹕於是山

行宮欲訪其廬而未果茲當迴鑾故和其山居雜詩書以賜之

且誌別也

遂初纔就賦選僻早成居香火聯新社承明憶舊廬對山開月  
戶問景入煙墟不可食無肉豈還經帶鋤

晚達頭先白旁求姓早聞銅龍勞課子金馬重研文暫閱京華  
景歸眠震澤雲省方欣便晤底事又重分

雅稱幽人里常臨香水溪梁春看燕入時曉報雞啼慢憶著簪  
舊堪醒巖電迷齊眉鮮同老況汝賸梅妻

碧海鯨魚掣老成許爾真陰鏗似奇句王翰卜佳鄰支俸教終  
老持梁漫歎貧優游林屋下可以答良辰

江山數千里不隔在知心力豈勝簪紱閒堪校詠吟巖扉白雲  
迴門徑綠苔侵阿那北窗下無絃好蓄琴

得友樂三益卜居號四宜有奇酬問字無病謝求醫雨後東郊  
日春前西崦時籃輿惟一子便倩里中兒

鬪茶傾石銚載菊泛蘭船鶴侶宵談月鷗心波穩煙松姿依巘  
古鐘韻帶霜傳探勝無多挈惟將筆硯前

吳下業書傭居然八十翁從嗟枝鹿野曾侍玉鸞宮茆屋千山  
裏溪田一水通課耕時復出蓑笠雨絲濛

盤石聊宜坐飛泉亦入聽來禽撫舊帖相鶴續遺經寄興屬霄  
漢搜題窮杳冥詩人今古有誰占此巖靈

雄談每抵掌豪詠卽雕肝意與高秋潔心如具水寬坐言行豈  
負時出處還安應有玉堂夢寸心寧改丹

倪瓚葉湖別墅圖

野水閒亭寫葉湖煙波杳靄樹模糊不因攬景來南國詎信村居有是夫

范文正祠

文正本蘇人

用義田記語

故山祠宇新千秋傳樹業一節美敦倫魏

國真知己夷維轉後塵天平森翠笏正色立朝身

題高義園

天平山之下范文正之祠在焉其旁有園一區子孫世守其業行蹕偶臨因名之曰高義而賜以詩

紆磴下靈巖天平秀迎目即夷度溪町菜黃春麥綠入松復里

許山莊清且淑林泉迴明淨蘭茝紛芳馥葱蒨入窗戶雲煙潤琴牘午橋義何取涑水樂非獨經臨望祠宇徘徊慕高躅文正之子孫家風爾其勗

白雲泉和居易韻

雲包白石石包泉無色聲天太古閒聊步天平問泉脈喜逢白

傳話雲閒

法螺寺

取勝多因僻入山不厭深巖花標法喜埭竹空去聲禪心雲態任

舒卷泉聲自酌斟華峯窗戶裏曾倚笠亭吟

支硎山茶依



蘇州府志 卷之二 遊幸中  
皇祖詩韻

支硎占斷古臨硎爲愛寒泉謾入聽韶景無邊富前度松巖不改是曾青

寒山圖題跋

名山之藏

寒山千尺雪爲吳中名處辛未南巡過其地留連久之顏其額曰聽雪各紀以詩旋蹕後於西苑熱河聽泉精舍皆以千尺雪題之壬申冬游暉甲石奔泉倒峽與寒山殆難伯仲因爲之圖記於是千尺雪之名四見矣爰各爲圖而合裝成卷俾分貯之更不必問寒山之孰爲先後也因錄前詩於卷端郵致聽雪閣

蘇州 行宮扁

擷芳攬秀

紫陽書院扁

白鹿遺規

虎邱佛殿扁聯

須彌春滿

雁塔影標霄漢表

鯨鐘聲度石泉閒

虎邱 行宮扁聯

春泉麗矚

喬柯嘉蔭盤陀石

曲澗清音感沸泉

海湧嵐浮

風聲滿徑竹鏗爾

春氣入林花翳如

吳天蓬閣

翠竹蒼松全壽相

清泉白石養天和

鄧尉寺扁聯

梵天香海

萬頃湖光分來功德水

千重花影勝入旃檀林

鄧尉山 行宮扁聯

眾香國裏

春入湖山韶且秀

雪凝樓觀淨無埃

千林煙月

道光志林作秋此從南巡盛典

靈巖寺扁聯

吳苑香林

雲去雲來池邊留塔影

煙凝煙泮林外泛湖光

靈巖 行宮扁聯

晴湖遠碧

雲峯翳翠

此扁道光志不載今據南巡盛典補

空際兩山青玉削

望中一界白銀鋪

靈巖

華山寺扁聯

蓮界雲岑

秀挺蓮峯觀空悟華藏

清延松徑聽法演潮音

華山 行宮扁聯

清池空碧

山色雨晴無定畫

泉聲高下不停絃

支硎山觀音殿扁

道風神駿

支硎 行宮扁聯

暖翠春泉

峰含畫意如懸軸

蘇州府志

卷首二

巡幸中

三六

澗有琴音不藉桐

千尺雪 行宮扁聯

聽雪閣

玉峽飛流

幽室數楹聊不俗

清機片晌恰宜閒

法螺寺扁聯

妙雲頂相

一徑盤雲瞻寶髻

萬山飛翠拱螺峰

泰伯廟扁

三讓高蹤

子游祠扁

道啟東南

賜宋臣范仲淹祠扁

學醇業廣

賜宋臣韓世忠祠扁

中興偉略

賜明臣文徵明祠扁

德藝清標

蘇州府志

卷之二

巡幸中

七

賜范莊園額

高義園

賜原任江蘇撫臣湯斌臣張伯行河督臣陳鵬年合祠扁

清惠揚休

賜江蘇撫臣王師扁

吳會風清

賜蘇州織造臣圖拉扁

采章明備

賜致仕侍郎臣沈德潛扁

道存風雅

賜庶吉士封司經局洗馬韓孝基扁

家學者儒

乾隆二十二年歲在丁丑再舉

南巡之典先是二十年六月十九日奉

上諭朕明歲南巡一應務從簡樸之處已屢降旨曉諭該督等

矣茲據尹繼善奏稱從前未及登臨之地如寒山別墅石湖

志無石湖二字此據南巡盛典補石佛寺棲霞山等處一併酌量興修以備

省覽等語此等處皆與行宮相去不遠間或登臨眺覽俱可即

日往返無庸駐蹕只當就山寺內原有屋宇可以憩坐之處量

為埽除不可專構行宮以滋糜費且修葺費用一併於普福所

奏商捐內動支其舊曾駐蹕處所外新豫備之處可畫圖來呈覽將此傳諭尹繼善知之三十日又奉

上諭巡省所過城邑除道清塵足矣前次南巡蘇州揚州城內街衢閒張設棚幔南方多雨且街窄簷低而上施綵幕既不開爽復滋糜費甚無謂也該督撫其飭禁之本年正月初二日奉上諭今春朕奉

皇太后鑾輿臨幸江浙間俗省方茲當翠華發軔之初宜沛渥恩用昭盛典邇年來江浙間被偏災其積欠未完之數又復不少雖維正之供歲有常經不宜任其逋欠然天時之不一亦非盡小民之過也若令新舊並輸於民力未免拮据著將乾隆二

十一年以前積欠未完地丁銀兩概予蠲免該督撫等其嚴飭所屬實力奉行俾恩膏普逮實惠均沾稱朕懷保黎元至意二月初五日

上諭禮部侍郎沈德潛致仕歸田年逾八十實爲蓬瀛人瑞今來接駕著加恩給與禮部尚書銜以示優念老臣之意初八日又奉

上諭江浙二省讞獄滋繁其中奸民之犯法者固多而無知誤蹈之人亦所時有況未抵於重辟尚可望其自新所有軍流以下人犯俱著加恩各予減等發落十七日奉

旨著派李景劉綸錢維城致祭周泰伯等祠凡分別賞賚高年

文童入學增額如十六年之例二十三日

駕幸虎邱頒

御詩藏香白金五十兩三月十八日奉

上諭朕稽古省方乘時布澤翠華所至賜資蠲租而省會駐蹕

之地加恩宜渥其將江南之江甯蘇州浙江之杭州附郭諸縣

本年應徵地丁銀兩悉予豁免用昭行慶施惠之盛典

召試進獻詩賦進士諸生

欽取一等進士一名授內閣中書諸生六名特賜舉人授為內

閣中書內第四名褚廷璋係長洲人第六名徐曰璉係吳縣

人吳縣壽民金旭陽年一百一歲迎

駕蒙

恩賞資荷包銀牌緞二匹銀十兩是冬復奉

特賜昇平人瑞四字

敕有司建人瑞坊

坊在胥門內地陽壽至一百五歲按此次

皆不著月日先後雜綴今據

遣工部侍郎錢維城致祭吳泰伯文

惟爾善承先志克振家聲慶篤姬宗緒陰貽於文武心存商祚

境難處於夷齊採藥而入荆蠻爰偕同氣端委而治周禮聿紹

雄圖名稱雖泯於當時流芳雅詠秩祀常欽於後代殷薦馨香

朕南國重巡東吳載蒞緬懷至德尚稽三讓之遺蹤遙溯高風

實啟千年之文教式循舊典用展明禋惟以歆承庶其昭格  
遣散秩大臣副都統懋烈伯李景致祭先賢言子文

惟爾秀毓東吳教開南國從游觀上聞型仁講讓之風出宰武  
城本愛人易使之訓守知能而識學源於道辨品節而知禮制  
乎情朕稽古時巡心懷賢哲夙仰絃歌之化益欽文學之宗訪  
宅里以非遙命具官而薦饗靈其昭鑒爰此明禋

遣工部侍郎錢維城致祭宋臣范仲淹文

惟爾學通經術名震邊陲表先憂後樂之心艱難任已守內剛  
外和之素志操過人綏輯諸羌奠危疆於磐石疏陳十事垂讜  
論於簡編秉信克孚屬國識龍圖之號褒賢擅美穹碑留馬鬣

之封朕稽古南巡有懷芳烈安貧贍族粹然儒者之家風給餉  
疏湖溥矣仁人之惠澤飭有司而薦饗瞻廟宇以非遙靈其有  
知尙其歆格

遣散秩大臣副都統懋烈伯李景致祭宋臣韓世忠文

惟爾豪俠傳家公忠成性受詔書而感泣力保危疆辨冤獄而  
激昂心排和議戰皆克敵以大儀之功爲最高業定中興實建  
炎以後所未有朕時巡江浙緬想風徽鎖甲空存義勇識將軍  
之號穹碑猶在清涼留居士之名瞻廟宇以非遙飭有司而薦  
饗靈其昭鑒尙克來歆

遣戶部侍郎劉綸諭祭原任禮部尙書湯斌文



惟爾行已端方服官敬慎出參方伯聿覘經濟之才入試鴻詞  
允稱淹通之選撫吳會而正躬勵俗清德可風蒞卿班而潔已  
宣勞醕修益懋朕時巡南國蒞止名邦溯遺愛於民間曾傳激  
濁揚清之治定義名於祀典猶聞黜邪崇正之風爰飭有司薦  
馨無怠靈其不昧尙克歆承

遣戶部侍郎劉綸諭祭原任禮部尙書張伯行文

惟爾砥礪清操敦崇實踐佩儒先之訓務日省以持躬凜冰薤  
之箴矯雷同而任職河壩佐理績奏安瀾閩海宣猷人知嚮學  
使節旋移於南國惠愛風行卿班遂晉夫春曹寅清望著朕輿  
蹕所至茂典聿昭緬舊碩以興懷錫苾芬而賁寵爾靈不昧庶

克歆茲

遣戶部侍郎劉綸諭祭原任河南總督陳鵬年文

惟爾種學克優負才特異稱親民之職訓俗勸農裕治劇之能  
發奸摘伏屢邀湔雪皆由

特達之知兩豫編摩雅擅博綜之譽始宣猷於近輔遂總理夫  
全河當官有守正之風建議奏安瀾之績朕再巡南國言蒞三  
吳聽輿誦之未諼眷懷芳躅命禮官而致祀式沛榮施爾靈有

知庶幾歆格

以上各祠祭文道光志不載  
今從南巡盛典補

賜蘇州巡撫愛必達

青齊障宿保吳下節新移民隱芻蕘達官方砥礪期允當知有

要寧止貴無私此地災傷後惠鮮莫漫遲

賜江蘇學政李因培

學校程材地江蘇大雅邦元龜要清正藻鑑辨淳龐莫負風簷

昔為求瓊樹雙菁莪勤樂育濟濟引鴻龐以上二詩道光志編蘇州啟蹕後誤也今

從南  
巡盛典移正

駐蹕蘇州

乘時展義玉鑾巡莅止吳城胥水濱春色由來南國麗民情較

比昔年親縱看道左多歡忭寧忘災餘有窶貧鮮蓋藏還尙華

飾此邦要務在還淳

觀蘇城閭閻之盛不減昔年既以慰懷兼成是什

旋轉深叨造化功昨春猶疫幸秋豐肉瘡剜補嗟黎獻滿益損

謙切已衷資食資衣厘宵旰任親任近繞西東羽林扈衛曾何

藉膝下原吾赤子同

凝懷堂

在蘇州織造衙門旁行宮內康熙年間所

賜名也適來居之輒成是詠

三吳巡露冕數字駐宵衣

寶額懸瑤篆凝懷揭妙機盡蠲塵慮擾常守道心微展義將繩

武如臨

聖日輝

蘇州府志 卷首二  
支硎山

問景東峯與碧泉支硎得號憶遙年可知愛鶴兼調馬那礙翻  
經及習禪圖書奇參窗戶裏筑琴響遞榻牀邊舊題宛在蒼崖  
泐何事苔痕半隱然

寒泉亭子

無泉不寒此擅獨鑿石引流溯復曲何當深夜坐孤亭萬慮都  
蠲一輪掬

寒山別墅

泉出寒山寒秀分支硎支昔遊曾未到名則常聞之煙巒欣始  
遇林壑誠幽奇應接乃不暇而盡澄神思庭前古榦梅春華三

兩枝孰謂宦光往斯人如在斯

飛魚峽

朗山誰假借浪水已疑然源溯雲中竇光澄鏡裏天投竿庾信  
釣漑釜甯封仙所遇欣初得澤因緬昔賢

馳煙驛

驛路馳煙著壁題客來衣履尚淩淩支硎秀色千秋映津逮遙  
思孔稚圭

綠雲樓

熙春新霽閒輕陰韶秀山姿暢好尋支遁寒泉纔滿聽宦光別  
墅又登臨紅梅翠竹天然繪妙理清機不盡吟千頃綠雲餅餌

計憑觀惟是悅予心

對瀑

九疊垂雲紳一泓注石髓卉物太昌妍藉茲足陶洗

戲題空谷

幽人昔時隱空谷與木石居鹿豕遊豈謂高卑起飛閣更教雜

還鳴羣騶徒觀梅竹三春雅便擬棲遲一刻留馳煙驛畔多條

穎空谷中有馳煙驛宦光所題云問爾低枝掃跡不

寒山千尺雪疊舊作韻

寒山卽是支硎山趙凡夫始疏山泉我昔憑觀愛清泚雲中曾

未窮其源隱人別墅茲一至故蹟歷歷閒評詮乃知芙蓉注乳

竇千支萬派斯依緣煙崖冰峽疊高下瀉爲飛瀑渟爲淵大珠

小珠跳澗谷五出六出紛林巒四時恆此舞滕六千尺幻欲生

藍田雪乎否乎否雪乎長笑人然我亦然揭爾題詩揭爾去淙

淙響在依稀閒

聽雪閣疊前韻

飛魚於雲中聽雪下珠倒置名象若斯耳適從寒山

來始遇空谷美辛別野今始過之過瀆卽范園水閣重憩止

峯色與泉聲識我重臨喜理解浪今昔耳觀無終始點筆一鞭

然偶如是而已

遊華山

蘇州府志

巡幸中

三五

跋馬度寒山屏秀苑相映天池知不遙由來稱熟徑圖經誌洗  
心柱史標養性初入松竹幽遂涉巖巒巨崎欽峭蒨閒時有飛  
泉迸鳴鞭豈不便安用山輿乘由方大吏備登山輿以策騎使弗用延緣造絕頂  
諸峯皆下凭春如白嶺來雲自無心鏡小立極遊日已足暢清  
興行漏報午刻歸鐘磬聲燈燈精藍禮莊嚴別室憩幽淨  
寶翰垂日月靈止靈止處仰  
昔踪起愛復起敬

恭依

皇祖華山詩韻

吞物和而益者山吞物和而益者山佛光舍吉旦

奎藻歲年侵籟奏風過竹歌喧暖啁禽石蓮華那在望古集遙  
襟

駐蹕靈巖疊舊作韻

熟路明知步步中穿松鐘識出花宮峯姿峭蒨四隣接塔影玲  
瓏八面通震澤遠憑鏡呈白雲窗小坐篆消紅靜觀何物名今  
昔行漏依然丁復東

臨湖榭

震澤三萬六千頃虛榭三閒十笏寬榭置澤上粒黍浮澤延榭  
中片鏡懸遊乎物外忘憂樂東坡昔道皆可觀偶來靈巖駐春  
蹕幾餘一憑臨湖欄氣清天朗陽侯靜具區渺渺無微瀾洞庭

西東列眉黛芥納須彌曾不難靈威丈人縱可接我心何暇求  
神仙

穹窿山上真觀

穹窿惟

帝宇巡待值春朝虔謁碧霄上

高居絳節朝雨暘願時若明日揭於昭精室蕭臺側憑欄縱目  
遙

拈花寺

暫乘紫機暇言訪青蓮宇穹窿真穹窿陽山卑爾許雲棧歷覺  
路山泉汲法雨春景青帝繪石脂赤松取遂造古道場信是出

塵所太湖當我胸雲煙與吞吐如如者西竺皇皇者東魯此既  
未能逮彼又何曾補徘徊兩增慙把筆欲忘語買臣乃俗吏往  
事奚足舉

穹窿山望湖亭望湖

震澤天連水洞庭西復東雙眸望無盡諸慮對宜空三萬六千  
頃春風秋月中五車稟精氣誰詔陸龜蒙

寄題包山

七十二山推最巨望中縹緲雲深所巴陵地道空傳名林屋洞  
天知何處靈威丈人竊素書天地大文藏夏禹一時遊目匪慕  
仙怪力亂神子不語

鄧尉山恭瞻

皇祖題額松風水月四字各得八句以題為韻

稱鄧尉者以梅而

睿藻全不涉焉然言不涉而意已賅此所謂得梅之神韻者乎  
觸目會心摘辭衍義亦情之不能已也

松

宿契權辭竹知音恆伴松友三見茲一並昔到斯重濤影籠香

淡冰心映翠濃問誰工品物大道在

堯胸

風

此海偏稱雪於春不礙風細傳香是玉輕綻蕾猶紅搖曳韻初  
麗吹噓氣正融設如擬禦寇光福卽崆峒

水

廣平腸是鐵高密心如冰彷彿見斯人何必稱仙子枝斜清淺  
上影弄漪瀾裏誰先獲我心和靖曾言旨

月

依稀有三山澹蕩方二月搖光入黃昏散馥飄清越淦淦映冰  
心稜稜標玉骨靜對仰

當年餘芬猶未歇

鄧尉香雪海歌疊舊作韻

鄧尉西北山名吾香雪海即吾家山在鄧尉山西北六里姑蘇志云附鄧尉昔遊未到茲到

初奇峰詭石更幽邃商邱三字泐匪誣虎山橋春水碧漲光福

塔舍利光舒湖山表裏互映帶都拱香雪為範模循名討實何

不可無妨片刻鳴鑿紆萬峯小別化人寺鄧尉山寺名至理緩問山

村途鄧尉山陰名至理彌高亘下真創見清芬冷韻非時趨襄陵淚漫

亦奚必蔚雲澈濟則有餘鮫人出珠珠不計海童邀路路多娛

香雪非江亦非湖天高地物散殊惟海為巨為委輸揚華繁

采無復需笑我昔年畧涉港歎觀止矣誠云疏由來於廓渺無

際即今乃見三山孤輿圖府志各執異明統志鄧尉山一名袁墓山而姑蘇志則云鄧

尉山在錦峯西南光福里俗名光福山與袁墓諸山相屬一鄧尉而袁墓光福二說不同紀載紛淆往往如此袁墓光

福寧非吳墟拘辨枉費工夫

靈巖雜詠再疊沈德潛韻

館娃官

石硯徑重尋春花風自舞昔日館娃處今時選佛土清梵落雲

松靜香飄埭杜於此暫息心何必論前古

琴臺

西蜀及東魯琴臺名紛然此胡亦有之蹟傳闔閭年松風寫謾

謾峽水常浥浥想彼三郎流聽之早欲眠

響屨廊

靈巖鎮古靈敞景當春敞山蹊誰藉梗名尚傳屨響無人歎露



葵有客尋煙莽荒幻總虛無無煩賦傷往

涵空閣

富媪不藏景高閣眞涵空不知名者誰窗納千巖風太湖在襟袖疑聞吟淵龍洞天若能到玉柱銀爲宮

吳王井

英英吐雲根汎汎涵峯頂秀峯寺其側舍利入塔影憶昔春雨中偶然一汲綆勿幕乃元吉既辭觀象井

研池

山川自太古峙峻渟者泠誰能奪化工泉白峯常青此池蓋昔有菁藻看斜橫非吳王所跡至理無須驚

采香徑

句踐用心苦陰謀藏弗露采葛不連蔓作絲織締素獻吳逞其欲吳歡墮迷霧羣娃猶采香曲徑春風暮

翫花池

德潛本幽人所居愛巖谷一再吟其詩調高義亦足偶憑翫花池印心呈澹淥遺蹟奚堪稱德水早淨浴

寄題南園

南園聞說貽王令林色泉聲鎮若新待漏院文曾熟讀豈伊狂飲醉鄉人府志禹偁曾爲長洲令有詩云他年我若成功後乞與南園作醉鄉

三高祠

祀范蠡張翰陸龜蒙范成大爲之記

碑記今觀范成大畫圖昔詠李公麟李公麟吳中三賢圖曾題句三吳共仰  
三高節避世常為住世人

遊天平山十六韻

吳會眾山鎮天平萬笏朝飛來峯拔地林立石干霄茶隴西鄰  
近支硎北戶招勢連高景秀氣接太湖潮是日春方仲行時興  
倍饒靈巖盤嶺路功德訪雲寮芳玉溪梅綻柔金陌柳搖行行  
見別墅緩緩度橫橋宛到前遊處間看舊詠標名園寶瀟灑范家  
高義園辛未賜名也古蹟半荒寥文正風猶在梓桑澤未遙小憩閒館  
更進步層椒翠樾庇虎密蒼巖突兀嶠庵傳遠公法泉溯白翁  
謠絕頂高無匹三吳望裏要未稱元氣復用是一心焦

高義園

磴道下靈巖名園尋高義霽煙斂寥闊韶光鬯明媚載過文正  
祠默讀義田記春和對芷蘭復緬後樂志白雲千載心名山五  
經笥我自勤政人流連未可恣乾惕意彌厪智仁懷偶寄

白雲泉再疊白居易韻

昔年少傅此題泉忘世高情祇愛閒我卻異香山所願願流膏  
澤徧田間

再遊寒山別墅作

吳中不雨亦多陰今日晴明悅可心截薛天平試閒攬篋緣別  
墅便重尋峯竄藉沐都疑黛泉豈須觀每聽琴更上綠雲樓上

望虎邱塔影矗平林

澄懷堂

應接雖無暇澄懷乃有餘底須施藻繪惟是愛清舒春是四時  
冠山如太古廬何當來晏坐重習少年書

琳瑯叢用杜甫佳人詩韻並效其體

一時憶杜詩空谷真空谷徑入琳瑯叢詎同凡花木化軸尚欲

培樵斧寧敢戮誰謂品曲人乃道不如肉淇澳將渭川羶薌遊

秉燭豈知寒山幽森此萬竿玉凡夫昔卜居常抱煙霞宿有夢

為蝶栩無淚為平聲民哭泉或時而清泉或時而濁社祭永吳

中荒祠尚老屋猗風情亦蕭影月手堪搗粉黛非佳人佳人即

修竹

芙蓉泉

芙蓉峯下泉輒以芙蓉稱泉固可植華峯則惟肖形賓主定誰  
是後先底浪爭峯泉胥不知曰人強安名

千尺雪雜詠

名園依別墅屈曲石牆通白是一壺地乃如大壑叢  
板閣坐聽雪昔年聲在耳飛流縱縱中後今同一視

迸水雲紳白詭石佛蓮青更看新樣出巖間笠子亭

出峽湧晴雪澹澹復皚皚臨流更親切恰見其源來

法螺寺

詭石詫奇峰蒼松盤曲徑窅深翠處林壑相掩映春禽唱清  
音澗花含淨性梵宇到面前乃識藏邃覓出密忽登高望遠如  
臨鏡吳中寺亦多此獨以幽勝設以擬詩人非賈宜在孟

賦得華山鳥道

嶠嶭復龍窀青蓮植半空白來稱鳥道頗覺異蘄叢疊磴穿雲  
白迴欄扶嶽紅竹聲曼風細花色鬪春融塞路遙相擬坦途此  
盡同遊山當讀書緩緩跋花廳

題天厯天池石壁圖

我登鳥道華山巔一泓天池乃俯視設從山下望石壁虛無應  
在雲端擬乃知居高見自廣遊於物內迷惡美漁山寫照卽境

披評圖莫若評其理

初遊石湖作

行春恰值好春晴橋上風光蓄眼清綠竹紅花他繪事黃童白  
叟我田情白楊煙水在襟袖葎確雲嵐若送迎卻訝祇園方外  
地起予兩字號治平

觀打魚歌

地方大吏備觀打魚因事已成略觀輒罷之而作是歌  
江鄉本以漁爲業煙水衝寒應不怯而我行時欲物熙人鉤魚  
斃非所悅施鼠連網圍周遭大魚掉尾小魚跳烹烝充俎供一  
嚼寧如噓浪聽逍遙木蘭每歲秋圍卽他他藉藉曾弗惜何慈

魚火居元 卷之二  
於魚弗慈鹿春秋溫肅殊南北湖魚寧實繁如斯我惟務實命  
罷之悠然而逝誠逝矣懷哉里革與臧僖

石湖懷范成大

參政築園處峰奇渚淨閒抗金存氣節匡宋豈高閒飛白淳熙  
代留青茶磨山餘情寄翰墨展讀卽開顏

泛舟石湖作

潮來接天水春入悅鷗鳧柳影金絲蘸蘭漪碧練鋪四時風月  
有萬古利名無怪底鴟夷子從茲入五湖

行春橋

越來溪口長橋接恰值行春橋上過魚躍鳶飛參物理耕田鑿

井樂民和

湖心亭

白洋滙處渚宮築水色天光有若無已自賞心兼悅目取名何  
必又西湖

遊上方山

治平路接楞伽院兩寺由來一寺分澗筑松濤相問荅峰容波  
態總氤氳座披荇確棲崖月泉煮曹溪嫡派雲底更圖經考同  
異從來紀載議多紛

郊臺

羽蓋乘齊亦壯哉當年僭祭起郊臺誰知五過招三寸自此橫

塘有越來

題文徵明傲黃公望山水卽用其韻

觀民豈爲事春遊衣食根源屢訪謀暇亦尋山  
渾愜意昔曾歷處憶從頭花初經雨紅猶淺樹欲  
成陰綠漸稠寫照恰欣披玉磬片時不覺畫中留

記得天平有范家清泉白石帶汀沙峯爲屏幃  
橫雲迴林繞墟問得路斜印我初心惟古月發人  
新思是梅花棲遲莫待吟喉燥便可松陰一試茶

江村橋及上沙塘十里非遙接蒼春日晴烘麥苗  
蔚水風輕度菜花香所欣到處供江硯豈事無端  
舉魯觴我笑衡山詎忙

者山靈應笑我真忙

二句反衡山詩意

五家意氣合生平

見徵明題句中

屨步春山入畫屏吳國人工吳土語

白雲泉傍白公亭披來小幘無多子留得層峰不改青  
衡泌端

知真賞在幾曾肥遯爲懷刑

遊虎邱雲巖寺

短簿祠邊尋舊壑吳王邱頂禮雲巖當時捨宅兄  
兮弟永劫超塵聖與凡霸業銷沈寒劍氣佛光今古  
鎮經函息機也識忘言好觸景興吟未可緘

靜觀齋

康熙四十六年賜額

齋額

璇題號靜觀

聖踪想像寶雲端管絃盈耳彼何聞禮義悅心斯所安

含暉山館

亦賜額也

水態山容清且妍山房勝日小周旋分明康樂詩中景著屐風  
流想昔年

沈周虎邱圖

勝約愆期客發船泉聲松影感無邊

見沈周詩

久哉山氣消金寶紛

矣鄺閒盛管弦

虎邱寺再和蘇軾韻

光瞻寶塔拾級登仙嶺遂徑造其巔下視富萬井松濤虎嘯

翻竹籟龍吟耿苟尚頰舌感此必下鼃鼃點頭聽經輩金矣不

復礦生公本無涉誰云服精猛髯翁絕世才儒佛場馳騁勝遊

詫豪句豈真增珍哽小坐仰蘇樓綠疇含麥頃爲祝今餅餌盍

忘昔饑冷人言元氣復我歎哀鴻永詎同彼子瞻無事但攬景

歸輿循山塘羣瞻翠華影施惠貴及時奚待大吏請

題錢維城借山齋圖

林泉印証真親切秀麗從來說虎邱四海爲家茲外苑憑臨不

擬借山遊

山塘策馬

山塘策馬攬山歸淡蕩韶春鞭漫揮烘受朝晴花蕊綻潤含夜

蘇州府志

卷之二

巡幸中

巽

雨麥苗肥日遊日豫所無逸樂水樂山亦靜機更喜吳民還易

教重來歌舞較前稀辛未南巡於返樸還淳之教三致意焉又

結香亭迎祝者率不敢備歌舞之觀足見從令為之心喜

開元寺詠古

開元石像鉢云白海中浮銘紀簡文帝序傳皮日休偈如演七

佛鉢上有七佛境卽是三洲擬土皮經閣因之縱遠眸

曉發蘇州

視河將欲至徐城五日姑蘇便啟行浙省萬民齊望幸吳川一

宿且兼程是日不駐南斗設緣玩景生留戀豈是因心凜旦明

老幼不須攀載道迴途當為去聲小停旌

自嘉興一日至靈巖駐蹕二首

攜李至靈巖一百卅餘里舟行縱順風比至亦晚矣長隄可跋

馬篤速便且駛易馬行逾刻風帆落後已北南殊所習其別乃

若此誰掛翰林帆布帆有大書翰林者晝寢方隱几前行馬及

之艤岸行且止隨行無事之舟率令前行是日謂彼落後勞彼

喜逸無比飽食倦且眠夜到亦可耳

易舟寶帶橋取道石湖寺跋馬上方山復行廿里地申刻至靈

巖罨畫峯愈翠坐我臨湖榭太湖在襟袂非歷半日勞那愜無

窮意往來已半月彈指訝何易

再遊寒山別墅



靈巖紆罕蹕所為遊寒山春曉宿雨收千嶂泮輕煙遵磴下高  
 峯天平在目前此則姑舍是已悉率戒盤過嶺不五里別墅爰  
 至焉截薛屏陡壁逶迤枕平巒行為半畝池激為千仞湍隨宜  
 置亭閣面勢抱林泉昨去落梅英今來綻牡丹今昨信幻耳來  
 去亦儻然凡夫果不凡即境知人仙中心以藏之句留蒼巖閒  
 清暉樓

架木為高閣疏泉得廓池滂聲階下聽秀色座閒披笙奏新篁  
 籟衣沾宿霧絲景參米氏畫神會謝家詩

聽雪閣作

范家有別業恰與寒山連過牆步幽徑趁此片時閒松泉繞古

意色聲真淨天板閣據峽上聽雪聊復然石湖出處皆宦光一  
 往焉無事對斯境吾亦欲晏眠今豈鮮其人過時名乃傳惕意  
 井三爻遊心白駒篇

聽雪閣疊舊作韻

宦光鑿石處引泉墮潭底其上有別墅我昔聞名耳今來乃一  
 尋兩奇信並美而此舊所賞亦可稱觀止映心鏡如朗蠲俗園  
 成喜擬水為雪得水源雪之始請君忘耳觀聽可弗聽已

遊獅子林

蘇州府城內

早知獅子林傳自倪高士疑其藏幽谷而宛居鬧市肯構惜無  
 人久屬他氏矣今為黃姓涉園手蹟藏石渠不忘賴有此石渠寶笈舊藏有獅子林

圖為倪高

詎可失目前大吏稱未飾

叶

未飾乃本然益當尋屐

齒假山似真山仙凡異尺咫松掛千年籐池貯五湖水小亭真

一笠矮屋肩可倚緬五百年前良朋此萃止澆花供佛鉢瀹茗

談元髓未擬泉石壽泉石況半毀西望寒泉山趙氏遺舊址亭

臺乃一新高下煥朱紫何幸何不幸誰為剖其旨似覺凡夫云

慙愧雲林子

詣

文廟行禮

文廟建城南相傳錢氏園仲淹得斯捨胡瑗聘還尊惟是重經

術何嘗計子孫

相傳文正得此園形家以為子孫當世世科甲文正乃捨之以為府學云

短長相較

量終覺勝于門

過紫陽書院疊舊作韻

書院鄰泮宮講學興賢俊斯為儲材地董率尤當慎潛老宏章

繼相讓如廉藺章更聞中人紫陽道應振性理無奇言躬行敦

至訓人已審所為改過要不吝去華以就實素位惟守分克已

苟弗力外染將乘費適因禮

至聖宮牆仰數仞過茲接諸生為誦勗新進暇當付剡藤揮毫

意以運

雜詠吳下故蹟

錦帆涇

高掛錦帆漾彩舟闔閭晏樂極風流鼠忘壁壁不忘鼠終致胥  
臺鹿豕遊

雞坡墟

臥薪嘗膽秘深謀請糴聊爲重禮求豈意狐卑雉偏傲鬪雞方  
復事豪遊

鱸鄉亭

林家亭子陳家句津逮都因張季鷹四柱中曾人幾閱尊鱸得  
味幾人曾

短簿祠

黑頭短簿如生面松竹叢祠清且幽千載名山歸法護當年志

未負優遊 王珣伯遠帖

辟疆園

勝槩曾傳顧辟疆後來任宅亦頽荒惟應豪放千秋述彷彿其  
人道姓王

交讓瀆

蹟傳陸曉與張融豈在隄楊瀆水中千載遊人常想像故應何  
點歎高風

戴禹宅

捨宅由來福地宜北禪皮陸昔聯詩門前碧柳黃鷗轉便是雙  
柑往聽時

陸羽泉

鱗皴石壁貯淳流  
縷汲壘瓶百尺修  
笑彼吳中泉品徧  
姓名翻落第三籌

三賢堂

五字蘇州是上乘  
白劉信和亦堪稱  
垂虹設以三高比  
卻覺斯堂風雅勝

齊雲樓

傑閣無須拾級登  
吳天縱目喜晴明  
白家詩及王家記  
來往吾懷早識名

滄浪亭

濯纓傲志寄歌詩  
怪石珍花儘足奇  
自是士信於知己  
不妨激語荅韓維

虎邱閣

版竅云當日朗時  
紙承寺景攬無遺  
見陶九成輟耕錄  
試為乃信無其事  
紀載荒唐率若斯

蘇州啟蹕作

金閶三日畧延留  
鳳艚平明啟蹕郵  
惠淶重期清入聽  
靈巖迴望翠凝眸  
豈無餘意民情戀  
更有殷憂河務籌  
況復秣陵亟俟

我便當減從一為遊

重題畫卷

蘇州府志 卷之二  
丁丑南巡游寒山別墅重過千尺雪坐聽雪閣疊辛未舊作韻  
紀事適展閣中所藏壬申郵置盤山千尺雪畫卷遂書其後

靈巖 行宮佛座識

法王調御天人尊轉法輪持大千界紫金光聚成相好來是西  
竺葱嶺外具大威德大利益導諸眾生大歡喜無量福徧恆河  
沙吉祥雲護大寶地清淨莊嚴眾瞻仰於諸供奉爲最上

靈巖 行宮佛堂梅花跋

西梵莊嚴釋迦牟尼文佛供於靈巖行宮香雪一枝寫爲龕屏  
本地風光如是如是

蘇州 行宮扁聯

吳苑清輝

軒窗自納雲霞氣

書卷常含草木馨

歌誦春聲喧井里

林巒曉色入樓臺

南國鶯花多勝賞

吳中山水稱清吟

氣清松竹有餘韻

雨足湖山是處佳

獅林寺扁

蘇州府志

卷之二

巡幸中

五

鏡智圓照

圓妙觀玉皇閣扁

穆清元始

圓妙觀三清殿扁

清虛靜妙

圓妙觀斗姆閣扁

珠柯朗耀

開元寺扁

靈著滄溟

瑞光寺扁

慧燈無盡

靈巖 行宮佛堂龕屏聯

金輪彩映牟尼淨

寶塔光含舍利圓

靈巖 行宮扁聯

臨湖榭

三春煙景染新藻

萬頃湖光開遠襟

隨安室

支硎寺聯

華海慧舟聲聞昭善應  
蓮臺香界願力普慈緣

寒山扁聯

寒山別墅

石擁雲根涵秀色

泉淙玉韻得清真

澄懷堂

修竹弄風金瑣碎

飛泉激石玉琮琤

對瀑

空谷

琳瑯叢

清暉樓

眺聽清機

芙蓉泉

綠雲樓

隨步山泉引清聽

悅懷煙樹入幽吟

穹窿山玉皇殿扁聯

穹宇清都

蘇州府志

卷首二

巡幸中

四

百尺聳丹梯鬱羅最上

羣峰環紫蓋顯氣常清

上方山佛殿扁

水精法界

上方山觀音殿扁聯

香雲應現

風吹貝梵聲聞寂

月照優曇色相空

上方山關帝殿扁聯

神佛賢豪



丹心自比午日炯

浩氣常存寰宇周

石佛寺扁聯

普門香梵

願力廣施甘露味


聞思遠應海潮音

海潮庵額

海潮庵

賜三山會館天后宮扁聯

德孚廣濟





忠信涉波濤周歷玉洲瑤島

神明昭日月指揮水伯天吳

賜霞漳會館天后宮扁聯

祥飈慈應

靈昭千里風濤看航通絕域

惠溥萬帆雲影驗雅舞神霄

賜邵武會館天后宮扁聯

靈佑恬波

廣著神庥錦浪平時開素練

長昭福佑彩雲飛處展靈旗

賜先賢周惇頤祠扁

光霽祠

賜蘇州織造臣安寧扁

虔共服采

賜在籍禮部尙書臣沈德潛扁

詞宗耆碩

乾隆二十七年歲在壬午三舉

南巡之典正月初二日奉

上諭朕恭奉

皇太后鑾輿巡省江浙翠華所過宜沛隆施著將乾隆二十一

年起至二十六年止所有積欠災田緩徵及未完地丁各欠項照二十二年例槩予蠲免該督撫等其嚴飭所屬悉心核實奉行副朕錫類推恩至意二月初四日又奉

上諭朕巡省江浙茲入疆伊始慶澤宜行所有經過地方本年應徵額賦俱著加恩蠲免十分之三此內或有去秋被水歉收者蠲免十分之五該部遵諭速行十四日奉

旨著派張成勳永福程巖張映辰致祭周泰伯等祠在籍諸臣迎駕十九日奉

上諭沈德潛錢陳羣著各賞緞四匹鄒一桂徐杞各賞緞二匹二十五日奉

上諭習寯許王猷著各賞緞二匹言如洙著賞緞一匹先是嚮導統領努三奏臣帶領蘇州知府李永書知縣介玉濤由香雪海直到

皇上指示之雷音庵看得所修道路九里內走過香雪海五里從光福鎮可由縣河邊行此處十八河俱入縣河此十八河現今雖俱起辦步行橋座似乎不及看得此河向靈巖山來甚直但有一橋略窄難容現今帶來二十八槳之船據知府李永書聲稱撫臣陳宏謀豫備如意船可以行走等語因爲走縣河甚直臣將上船下船二處馬頭俱在圖錄上黏簽進呈或由旱路行走或由水路行走之處恭候欽指敬謹豫備

可也二十二日奉

旨著在光福鎮雷音寺豫備三月二十三日總督尹繼善面奉諭旨凡各馬頭地方只許鋪棕毯不許鋪紅黃等毯二十七日

奉

上諭朕恭奉

皇太后安輿臨幸江浙翠華所至調資疊加而省會駐蹕之地宜循茂典載沛渥恩其將江南之江甯蘇州浙江之杭州附郭諸縣本年應徵地丁銀兩悉予豁免用昭行慶施惠省方勤民

之至意

以上各月日今從

諭旨道光志皆不著南巡盛典補正

召試進獻詩賦進士諸生

欽取一等進士三名授內閣中書諸生五名特賜舉人授為內

閣中書內進士吳泰來廩生錢襄皆係吳縣人

駕幸虎邱頒

御製詩章對聯扁額大莊嚴世界海圖墨刻藏香白金五十兩

道光志海圖上有吳字此吳縣民婦席符氏攔

駕訴冤奉

旨發該督撫審勘勘無異辭復以原獻上

吳門補乘云先是洞庭東山席慎少兇頑

混名席蠻子以屋產故屢謀求於劉纘元纘元苦之乾隆丁丑歲除復往劉家踞門大罵巡檢司姜弓兵勸解去姜謂劉

曰盡除之劉愕然不語明年春姜邀蠻子飲醉縮死於席氏墓道而納屍於坎慎之妻符氏見夫不歸造姜問焉姜以行賈對越數日偽為席附以白金致諸符符信之其夏翠峯出蛟山水陡湧沖出一屍面如生符隨眾往觀則儼然夫也

蘇州府志 卷首二 巡幸中 庚

報縣檢驗縊痕宛然符哭曰是姜某之殺吾夫也因訴其邀  
飲及寄信狀姜知難隱曰劉實命之於是并逮劉劉至具陳  
顛末乃罪姜而貸劉  
至是符復控劉指使

賜蘇州巡撫陳宏謀

外吏中惟久由來繁鉅勝體予視傷切謂爾佈恩能必有遠猷

贊寧惟苦節稱金閭誠富庶返樸最相應

賜江蘇學政劉墉

皖歛嘉能職吳淞俾董繁先經後干史多行去聲寡文言可作化

裁法毋孤簡用恩繫予勤實政藻頌不須煩以上二詩道光  
不載今從

南巡盛  
典補

駐蹕蘇州疊舊韻

五載今來又一巡胥江舟駐郡城濱仄街按轡斥警蹕蘇州街  
最窄辛

未初巡大吏欲擴寬之以不便民  
弗許左右就瞻之民近至馬足也  
比屋迎鑾共戴親外飾信堪

稱富庶遠隅自不乏飢貧益祈歲事常綏稔何患民風不化瀄

疑懷堂疊舊作韻

省方勤輯物高處上聲  
去聲垂衣每得瞻

天藻恆因仰

帝機當春蓮漏永坐久蕙煙微萬慮澄無滓松簷素月輝

賜沈德潛

去歲入都祝

慈壽皤然九老領林泉致仕九老中德潛  
職與歲皆居首清詞還擅香山會葢

事便教故里旋更止遠迎塵跋涉

在籍人臣去冬赴京晉祝歸里者今春令就里門迎接毋

庸越省遠來以節勞動

所欣重晤得留連論文兼及蒼生隱虛席誰嘗宣

室前

支硎山

棗葉須彌復義尋支硎奚礙號觀音

支硎又名觀音山

春山依舊開圖

畫平石何曾識古今當戶松撐千丈蓋落溪泉奏七弦琴馬嘶

牆外鶴籠院似憶雲巖有道林

寒泉亭子

曲折盤山徑別墅猶在西野芳發幽香行行遲馬蹄山寒泉亦

寒醞流率成溪此亭獨擅名孰謂與物齊奚礙一變嘗因之悟

天倪

放鶴亭戲題

支硎谿壑多分支寒泉樓閣早弗寒獨喜四柱稱放鶴猶存本

色臨荒山道人已往不復返胎仙一去誰期還千年丁令致可

笑惜未忘情於世閒

寒山別墅

幽人留舊址大吏事重修自藉林泉秀微嫌花木稠片時軒榭

憩昔日景光適欲起宦光問居斯可肯不

對瀑疊前韻

石縫飛振鷺仙漿復道隨今昔了不隔那有塵心洗

梅開

梅開恰似幽人笑不入時妍出淨芬漫議宦光今趁拍魏徵賦  
媚有前聞

飛魚峽疊舊作嶺

飛魚亦此峽漫訝豈其然地借甯家地天猶浪水天一空能外  
物萬有總真仙而我原無涉惟求濟世賢

戲題馳煙驛

高士昔年此肥遯出塵瀟灑樂泉林苟無周子參差意何必馳  
煙自表心

綠雲樓

別墅題名率因舊高樓綠雲我所題萬民生計恆深厯千頃麥  
苗今復齊雨意霽隨輕風散露光濃入曉煙低登樓騁望意多  
愜不在花香與鳥啼

寒山千尺雪再疊舊作韻

南峯東峯總寒山之佳以多流泉吳人疏剔慣綴景誰能一  
一分根源設云彼非此乃是是謂執象求言詮寒山別墅適小  
憩山鳥春花喜有緣就中修篁為最美个个玉節臨冰淵范家  
名園一牆隔過門更不勞陟巒各有長異眼界總無些俗娛  
情田聽雪之閣我予額雪聲雪色皆依然便擬聚星一再疊興  
寄非色非聲閒

聽雪閣再疊前韻

四季此雪恆垂空落巖底翻笑綏綏者所擅惟冬耳實有時而窮名有時而美使以何而行尼以何而止達斯乃可聽聽雪吾誠喜從從颯颯中無終復無始得句便前行寧宜耽未已

遊法螺寺書懷

山寺勝以幽林壑綠而邃支硯北屏秀天平南襟翠喜此處僻境向曾一跋騎本色佛道場那在莊嚴費今來殊所觀亦頗事點綴鳩工非庶民施檀云大吏惜哉不二門幾至無隙地小坐命返輿書懷誌吾愧

再依

皇祖華山詩韻

峭拔諸峰表兼之巖穴深自多真賞在那有俗緣侵古意指禪柏春聲出語禽

軒文護丁甲景仰緬

神襟

駐蹕靈巖再疊舊作韻

峯堵高標雲表中其旁了識有行宮松陰羃谷盤桓上磴道梯巖曲折通衛士暫休仙蹕護山僧應笑禁門紅夜深底是前緣續清磬一聲隔院東

臨湖榭詠古

靈巖軒閣率仍舊臨湖之榭敞且清三閒雖小納空濶復無松竹庭前橫太湖萬頃挹襟袖縱觀意與天水并館娃池徑蹟俱在奚如少伯乘桴征鳥喙共憂難其樂子禽不去走狗烹耕齊居陶又何謂要之所止皆成名

靈巖夕景

吳雲欲雨旋澄氛千巖松翠含夕曛震澤波光在襟袖曠懷似覺濤聲聞海天孤月不可叫時廿二日月已遲故云火樹銀花實厭鬧夙已傳宣槩罷之卻欣無欲堪觀微須與暎合萬狀寂崇情捫得寥天一塔鈴落落度風鳴分明偈說無今昔

穹窿山上真觀

見說古由鍾乘閒陟碧峰上真嚴祀

帝四黼切祈農奚必逢茅固無勞學赤松具區眼底近可以暢心胸

題拈花寺二首

紺宇祇園棲碧岫裝嚴相好坐金身滿庭白白紅紅者都是無端微笑人

僧寺居然道觀鄰上真觀亦在山頂底須同異辨疏親名山綴景由來

久惟愧何方牖此民

鄧尉香雪海歌再疊舊作韻

辛未香雪詩題吾山陽韶秀驚識初丁丑乃至山陰境翻覺前



作鄰傳誣由來錦峰光福里諸岡連屬互卷舒圖經取此或失  
彼率鮮考實多依模滕六一岡霏玉屑豈以南北分縈紆三壺  
祇在巨瀛表相隔萬里非通途彼雪仍雪海仍海可以例此原  
同趨松風水月竭廢韻見前詩行漏清暇還有餘辨疑求是則且  
止過嶺適可尋幽娛且喜此海非臨湖無相形益覺邈殊詎藉  
百川為灌輸無為利涉雲天需眼界真色色寂寂鼻觀淨芬芬  
疏疏大圓鏡中合相前茅後致兩不孤依韻紀事聊得句或  
者破訛志正吳亦弗更斬志正吳吉人辭寡有以夫

鄧尉山恭詠

皇祖松風水月額疊舊作韻

弄影水將月結朋竹與松

聖人契理獨春日和詩重老幹偏宜覆寒花不肯濃依依投氣  
味落落洗心胸

右松

都借風吹落吹開亦藉風玉瀛解揚白銀燭慙去聲搖紅活脫春  
林態霏微日午融乍如訪姑射漫擬獵崆峒

右風

鄧尉萬峰山太湖一片水相對有餘趣可曰無多子言影那忘  
形因表亦知裏會心迴不凡

璇題揭妙旨

右水

何嘗宿此山浮動待宜月勞人言逸韻如秦視彼越想像入鏡  
姿自古離塵骨欲問圓缺中花事幾興歇

右月

鄧尉梅事未盛因而有會點筆成章

居然鄧尉看初梅今歲春寒實異哉有色相輸無色好十分花

纔去聲兩分開端知爛漫無多趣適可優游得靜陪卻覺山靈如

致語餘杭返棹試重來

靈巖雜詠三疊沈德潛韻

館娃宮

每疊德潛韻逸興輒鼓舞是中元音桴篥而鼓土館娃雖豔  
哉華清曾詠杜荀不失美刺自足傳今古

琴臺

東坡醉翁操空山響琅然姬光豈能琴有臺傳遙年攫醪久不  
聞惟餘礪水浚詠古抽繹思春蠶方未眠

響屨廊

山腰洞穴深外狹而中敞石安得有聲云藉梓以響百計悅蛾  
眉萬古委榛莽後誰襲其蹤齊宮踏蓮往

涵空閣

高閣俯具區天水相與空來往挈舟者布帆不避風曙光看浴

蘇州府志 卷之二  
日夜吟疑聆龍洞庭縹渺閒虛無仙人宮  
吳王井

名山有名泉往往淙山頂屈哉託吳宮曾照吳姬影銀床金轆  
轡晨裝沈素綆跼踖秦餘杭迴首空憶井

研池

研山作館娃研池貯清冷不可測其底俯視深含青輕風起微  
縐鞞紋縱復橫並無竿絲投醉魚何事驚

采香徑

句踐行九術伐吳機早露施旦入吳都體不勝紈素采香供靚  
妝麝風散花霧那慮越兵來惟恐日易暮

翫花池

乘陽行時令豔裔鋪阿谷離宮奚遣暇敲吟興未足歸愚有佳  
作淡似春波淥依韻凡三廢藉以揚清浴

沈周桐筠仙館圖卽用其韻

茅屋蕭然灑水西筠竿梧葉翠陰迷高人坐得真仙體那藉丹  
臺永鼎啼

題上方山楞伽寺

跋馬平明到上方闍黎恭迎去聲蹕塗旁試參鳥語花香者義合

楞伽第幾章

治平寺

上方策騎下山行小憩精藍喜治平傳弈當年知此義空桑蕭  
瑀不閒評

題崖峯山

柯峰云自具區移卷竿牽溝尚有基天造山川詎人力鑿哉吳  
語太傳奇

遊石湖疊舊作韻

江春妨雨那妨晴麗日和風景正清重到宛然識熟路迴思未  
免動閒情田蠶豐儉彤宮計老幼安懷翠蹕迎小石湖分太湖  
水漪瀾不起鏡光平

行春橋

溪跨越來山對橫小長橋正好春晴翠巒自有上公奉白鹿猶  
傳太守行堪悅目雖三月景最牽懷是萬民情肩摩踵接寧嫌  
鬧但慮塍田誤爾耕

湖心亭

地分震澤萬之一名藉西湖偶不奇隄上目遊意已足更無須  
命畫橈移

題石湖

山前將謂石湖是誰識山腰始是真必有小方能有大不全主  
則定全賓一清見底白沙疊半壁爲匡翠薛皴大士如如滿月  
相色空闊盡往來人

小憩瑞光寺

兩日遊山歸郡城赤烏古寺偶停旌便成五色塔光現未識如  
來行處行

詣

文廟行禮

每問招提境藉舒山水情

泮宮惟致敬

聖道正昌明那見梅英發愛聽松籟清過牆卽書院多士勗躬  
行

過紫陽書院示諸生

士惟首四民名在副其真道重繼濂洛地寧拘歛閩研精味經  
訓晰理守彝倫莫漫虛車節吾方企化淳

遊獅子林得句

一樹一峰入畫意幾灣幾曲遠塵心法王善吼應如是居士高  
蹤宛可尋誰謂今時非昔日端知城市有山林松風閣聽松風  
謾絕勝滿街絲管音

遊虎邱雜詠四音

策馬山塘不用船武邱小別動經年喬柯嘉蔭盤陀石曲澗清  
音盛沸泉

本來巖壑擅天成虎踞偏稱金氣精五載光陰爾許異越加親

熱是民情

何點風流有足思梅花開矣向南枝一峰如與天平較小許無妨此出奇

風聲滿徑竹鏗爾春氣入林花翳如最喜登樓聊騁目千塍新綠麥芒舒

題虎邱雲巖寺

閶門西轉歷山塘尋勝雲巖春載陽推峯容真虎踞荒唐劍氣幻魚腸司徒文學應稱獨洗馬風流不可當高處縱眸喜有在近遙綠麥一方方

靜觀齋

雲巖寺側幾間屋

羲畫昭回歲月深絲管叢中山水趣觀辭敬識

聖人心

含暉山館

巖壑天成真秀拔劍飛虎踞失之誣娛人山水清暉永謝氏詩

還沈氏圖

沈周虎邱圖石渠寶笈上等

虎邱寺三疊蘇軾韻

地脈伏來龍突兀湧巒嶺石梯五十三未至勞捫井真覺泉石

佳幻傳光怪耿吟誰虎與龍雜或毒兮龜湛盧及干將紛稱裂

蒼礦

越絕書言虎邱池劍三千魚腸在焉吳越春秋風胡子曰吳王得越所獻寶劍三枚一魚腸二紫郢三湛盧魚腸已

用刺僚弊郢以送其女湛盧入楚又載干將鏃邪夫妻鑄劍二  
 匿其陽獻其陰故姑蘇志記于將墓有青蛇繞足事乃楊維禎  
 沿蘇詩專引湛盧則與入楚之文不合高啟既有干將墓詩而  
 劍池詩又云干將欲飛出夫干將將陽劍既不獻而白匿於墓其  
 未入劍池三千之數可知啟何轉舍魚腸而取此絕不相蒙惟  
 者蓋稗史語本無稽而文人一時傳奇不無譌舛率此類也惟  
 喜蘇子瞻材雄氣猶猛細故弗記憶鑿空詞場騁左右取逢源  
 聰明非壅哽我來凡三度今昔祇俄頃亦三疊其韻小立春風  
 冷觀民有正務偃息詎宜永駕言返翠華江城麗午景借問興  
 所託雲外青蓮影有暇當再臨名山訂予請

卽事

曾兩南巡風土知入春易致雨淋漓謂當今度如前度卻鮮陰  
 時多霽時寒勒梅巖紅始吐潤含麥坂綠方蕤以云攬結斯誠

好恐誤農耕爲惕思

唐寅桃花庵圖

吳中愛看吳人畫況是吳人畫最高世上祇期爲散木庵前疑  
 復綻新桃松風寒處安茶銚石凍春深試酒槽七字志懷頗見  
 道愛其善亦懶爲何况惡富非所望宣云溪壑興堪陶

過寶帶橋有詠

金閨清曉放舟行寶帶春風波漾輕孔五十三易疏洩漲痕猶  
 見與橋平

三高祠

避禍何曾忘貨殖范思尊真是見幾圖張天隨不赴蒲輪召陸

蒙 一例三高安勉殊

迴蹕至蘇州

迴蹕至蘇州葑門泊御舟郡城徐按轡仄巷不鳴騶接踵摩肩  
眾授衣足食謀萬民親切意兩日得因留

摹倪瓚獅子林圖並題以句

獅子林稱薌故吳倪迂舊蹟不宜無石渠妙品難虛彼倪瓚是圖已入

石渠寶笈上等不可置此而竹院清娛漫傲吾雖亦循門得蹊

去因摹其真跡命永藏吳中徑真成依樣畫葫蘆裝池付弄留佳話惜墨閒情或可夫

三賢堂用高啟韻

宣帝昔言治惟二千石賢承上而接下有惠賴布傳唐時循吏

傳非一不累牘連於蘇以三稱能起民瘼注京兆性高潔五字如

神仙樂天不治沼鳶飛魚躍川夢得課政最笑傲華峰蓮三賢

率同轍豈因簿書牽季迪作詩頌亦可觀其年今復數百載望

之若雲煙長吏何日無艱哉別嫌妍日計與月計漢詔披書筵

畢然興遐思遂以廢其篇

顧辟疆園

吳中池館清無比江左風流夙有聲任晦園雖不可考郡人猶

識辟疆名

支遁庵

支公當日此肥遁刻石為龕隱翠棧卻是無能遁後世至今庵



尚以支稱

出閶門遊寒山即景二首

清曉出閶門輕陰涼變暄遞來將雨意

南方涼則雨暖則晴北方暖則雨涼則晴風氣

黃較繁將興耕作矣愛聽上農論

鳴鞭度慶橋別墅見山椒小憩支公閣旋憑趙隱寮竹虛原自

密花冶卻非妖欲暢青蓮想法螺喜不遙

澄懷堂

別墅多佳號澄懷我所題飛魚峽之上瀑布澗猶西遊目樂山

水甄心悟莞倪無能斯久坐苑外馬聲嘶

芙蓉泉

泉以峰名峰俯泉春風翠蹕小流連清暉表裏欣相映一朵芙

蓉上下鮮

清暉樓

寒山別墅裏高閣曰清暉是日重來賞春光正入微含漪訝波

立落影認峰飛那更因天繪勞勞辨是非

戲題馳煙驛

馳煙驛路見孔德璋北山移文宦光所以命名也前屢有詩今

見石上刻驛為嶧命更正之並戲成是什

驛路馳煙移草堂千秋結想有宦光何人泐石稱博古不見孤

蘇州府志  
卷之二  
桐日嶧陽

法螺寺

竹徑通幽竺二字披高樓延賞坐移時華山更不煩重到几席之閒攬莫遺

天池

天池有水瀼漿如彷彿明皇玉女居度難在人寧在境日毋錯

會枕中書

老子枕中記華山可度難池在山之巔故高啟詩有靈峰可度難昔見枕中書之句

題高義園

萬笏天平翠名園有范家但看題兩字早覺勝其他兩意如湔竹風情善舞花麥舟前軌在善繼莫教差

白雲泉三疊白居易韻

白雲泉是白家泉林色嵐光太古閒不為炫能頻疊韻高人風

度緬其閒

題龍門用高啟韻並示沈德潛

導河白龍門卓哉神禹蹟三峽流東黃萬古浪無白明傳四載

乘幻詎五丁劈天平忽有之亦非一朝夕青邱曾留題逸興託

泉石我來遊范園萬笏看累積細雨偶罷登應是塵凡隔展集

愛格高賡詩虛韻窄欲罷又不能聊以抒吟魄千乘與萬騎豈

必沿幽壁不如付高士枕流漱石激季迪非忘世無景思點額

何一謁真龍

用季迪語

還削神仙籍德潛大勝之老作金門客

黃公望浮嵐暖翠

春入千林暖翳然翠靄披天平恰當面氣韻訝如斯景思

用高啟虎邱次清遠道士詩韻

清遠竟何人清詞麗霄漢豈其謫仙籍塵世等遷竄飄然落吳

下虎阜一遊翫驀遇沈恭子殷周談汗漫仍復返雲衢誰能窺

道岸魯公書劍池漫漶苔蒙亂此詩未磨崖得全乃以半青邱

出塵想和韻懷聚散而我茲劫來勝跡遇春旦依樣易得句詎

云誇藻翰本無求仙心饒有憂民歎流連非所宜勅幾思益贊

劍池

山川宇宙來便有豈信劍飛劃作巖四字宣尼曾不語惜哉佳

境瀾愚凡

再遊靈巖作

昨日細雨今朝晴南國為喜宜春耕靈巖秀色在咫尺姑舍遼

待非近情出郊郭町濯綠澗花柳時世裝嫌輕駢填老幼步隨

馬禁躡菜麥憐農氓不三十里候已到盤旋山路原熟程松風

謾謾掃塵跡塔影轟轟標心旌調御丈夫對我笑去來現在奚

稱名到此著語不可得逡巡行館憑南榮太湖眼底一勺水三

萬餘頃誰量衡但覺空濶物不染無內外復無將迎我心與之

然乎否風鈴落落催宜行

採蓮涇

若耶溪上女忽作吳宮人不知四術行百計悅嬌顰蓮開涇水  
芳蓮謝涇水戢幾謝復幾開越兵由此入

遊上方山楞伽寺

治平西去總湖邊熟路分明憶昔年山色波光相蕩漾蜂臺鹿  
苑實駢田當春忍草奚爲忍泯識禪枝果是禪若問楞伽標妙  
諦峰峰法爾茁青蓮

行春橋乘舟歸蘇州行宮卽景雜詠八首

蹋馬靈巖復上方石湖側畔小徜徉昨題七字磨崖讀昨仲春  
游石湖

時見山腰一泓清泚可愛四面皆石大士閣在其上因  
題有誰識始是真之句今來重游則已泐巖壁閒矣行館言  
旋進便航

白芷青蒲演漾舒漁舟艤待欲何如繫予漢詔猶曾憶生養方  
春不打魚

行春橋下春水明行春橋上萬民迎我欲治民如治水消之則  
濁澄之清

亭子湖心從未到西湖攬景況方迴勤民都似此爭勝吾更何  
憂不治哉

平流一帶郡城西潤逼吳天霽景雋水碓溪橋皆入畫男耕女  
織總堪題

菜麥潤含方過雨杏桃芳鬪恰烘晴省春正義夫何謂詎謂無  
端問景行

蘇州府志 卷之二  
馬行本較舟行速溝洫紆迴反致遲因悟北南形勢異諸凡要  
適用為宜

鳴榔廿里胥門到按轡城中路不遙夫略已觀民意悉江寧發

駕定明朝以上八首道光志誤編入乙酉南巡盛典移正

蘇州啟蹕作

兩日駐行旌黃龍發水程不耽惟我志略戀是民情吳會歌聲

遠惠山秀色迎東南風恰好卓午到舟營

蘇州 行宮佛堂扁聯

福德相

圓覺光常垂妙鬘

吉祥境本徹優曇

蘇州 行宮神堂扁聯

篤純佑

居處式憑資拱衛

馨香儼在契神明

蘇州 行宮扁聯

南國熙春

閭臨詠蕩通民隱

里撫殷豐驗物華

窗意包含畫

天容醞釀春

寧惟容膝務

敬念治民方

獅林寺額

畫禪寺


圓妙觀扁聯

太初闡教

圓筦叶三元仁宣橐籥

妙機含萬有壽溥垓埏

虎邱千頃雲扁



靜觀齋

靈巖 行宮聯

每因物表延遙寄

似與天游得靜陶

座挹山光將水態


窗延秋月與春風

蜃窗縱望湖天澗

鈿几披吟花柳妍

雲容水態不相厭

畫意詩情分與投



巖依古髻山常在

湖滿祥輪鏡本圓

寒山馳煙驛扁

馳煙驛

香雪海聯

疏影橫斜水清淺

暗香浮動月黃昏

穹窿山聯

太湖萬頃在襟袖

穹窿億丈凌星辰

石湖扁

石湖

治平寺大殿扁聯

水觀澄因

戶外一峰秀

階前眾壑深

峰頂香雲凝妙覺

湖心寶月印摩尼

報恩寺扁聯

吳雲香梵



71002808

茂苑霏春三果同參開鹿苑

祇林現瑞一峰遙接證獅林

賜在籍禮部尚書臣沈德潛扁

九袞詩仙

